

ten Gefäncknissen vnd Banden errettet/ vnd gleich wie auß einent todten stinckenden Cadauere, in ein wolriechenden lebendigen Leib transferiere vnd versetzt werden/ vnd diese/ diese/ seyn die rechten löblichen/ krafftreichen formæ remediorum, welche in einer geringen Quantitet vnd Vielheit dem Krancken vberreicht/ ja durch welche prophetische Wunderwerck nechst Gottes Gnad vnd Segen/ in der Curation des schwachen/ menschlichen Geschlechts/ verrichtet vnd ins Werck gestellt werden mögen.

Dieweil wir aber bis anhero / weitleufftig / jedoch ordentlich vnd deutlich genug / von der Nothwendigkeit der gebührlichen Præparation vnd Administration der Arzneyen gehandelt haben: Dieweil auch die vornembsten næui vnd Mängel der Zubereitung der Alten klärlich / der Wahrheit halben/ angezeigt seyn: Dieweil zuletzt etliche/ wol in der Natur vnd Erfahrung gegründte vnd bewehrte præcepta, Lehre vnd Vnderichtung von der Destillierkunst mit höchstem Fleiß an Tag geben vnd beschrieben seyn: Darauß ein vnaussprechlicher/ werther thewrer Schatz der Zubereitung der Arzneyen kann erlangt vnd bekommen werden: Will ich einen jeden auffrichtigen vnd die Wahrheit liebhabenden Arzt in Teutschland/ so dieser legitimæ Præparationis & administrationis remediorum noch zur Zeit vnerfahren ist / hiemit trewlich vnd brüderlich gebetten vnd ermahnet haben / er wolle beneben mir / sich des Gestancks der Kohlen/ der Verlust des Rauchs/ derselbigen fleissigen Handarbeit nicht verdriessen lassen/ sonder Tag vnd Nacht auff ein solche Zubereitung vnd Handreichung der Arzneyen dencken vnd trachten / dadurch nicht allein die geringen/ sonder auch die grossen vnd schrecklichen Feinde menschlicher Natur herunder gebracht vnd überwunden werden mögen/ sintemal Gottes Gnad nicht kleiner denn sein Zorn vnd Straff ist: dadurch die vberschwengliche *φιλανθρωπία* vnd Liebe Gottes gegen das menschliche Geschlecht zu diesen letzten bösen Zeiten vnd lawfälligen/ Frachendem Alter der Welt / menniglich bekant vnd offenbahr wirdt/ vnd ein jeder zu grösserer Danckbarkeit gegen Gott erweckt vnd angezündet werd.

Dadurch zum Beschluß die löbliche Kunst der Arzneyen / sampt
ihren